



Novas dallas soras da Glion

Dapi 70 onns ein soras da Glion activas ella lavur sociala en Brasilia — Otg soras ein mortas en in onn a Glion.



Igl onn vargau han otg soras bandunau la communitad per adina.

FOTO YANIK BUEKLI



Dapi 1952 ein las soras **dominicanas** da Glion presentas en Brasilia.

FOTO MAD

GIUSEP CAPAUL/FMR

Entschiet ha quei tut a sias uras che soras da Glion han accumpignau famiglias tudestgas da fugitivs (Donauschwaben) suenter la Secunda uiara mundiala e gidau quellas a baghegiar si ina nova existenza en Brasilia cun sustegn dalla Caritas.

Denter las soras da Glion ch'ei idas da quei temps en Brasilia secattava era sora Modesta Cavegn da Tujetsch, morta il schaner d'uonn. Ei era stau il grond giavisch da quella dominicana tuatschina da saver ir cun 28 onns en Brasilia, nua ch'ella ei s'engaschada fetg e restada tochen 1979.

La Procura dallas missiuns dalla claustra da Glion ha sustenui trasatras finanzialmein fetg ils projects dallas consoras en Brasilia. Dapresent viseta la menadra dalla Procura, *Christine Imholz*, la Brasilia per saver far el liug sez in maletg digl engaschi dallas soras e lur conlvreras e conlvrers leuen. Segidau vegn principalmein cun affons, giuvenils e lur famiglias che vivan ella periferia dils marcaus.

Suenter delta ed omicron – novas sentupadas

Las soras da Glion selegran dalla nova entschatta, oravontut ella Casa da sentupada suenter che tontas occurrenzhas han buc astgau ver liug en consequenza dalla greva pandemia corona. Ledas ein las soras che la baselgia claustrala ha puspei saviu vegnir aviarta sonda, ils 5 da mars 2022, per persunas d'ordeifer, e quei alla fin dalla jamna pils suandonts survetschs divins:

La sonda allas 17.40 pil laud dalla sera, la dumengia allas 07.30 pil laud dalla damaun, allas 10.00 per la s. messa ed allas 17.40 uras pil laud dalla sera. Persunas d'ordeifer portan mascrina. Aunc buc aviarts ei il Café Quinclas.

Otg soras – mortas en in onn

Sco quei che sora *Annemarie Müller*, priura generala dallas soras da Glion, communichescha, ein las soras confruntadas stediamein, muort l'aula vegliadetgna dallas mungias, cun viver e murir. El decuors digl onn vargau hagen otg soras da Glion bandunau ellas per adina. Ils 17 da december 2021 ei sora Eugenia Jörger da Val S. Pieder, morta cun 65 onns tut anetgmein. La mort dall'antieriura sora priura generala ha consterniu fetg la cuminsonza.